



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 7

**Dadra & Nagar Haveli MP, Mohan
Delkar hotel ka nung soseta asü**

TAPAK 10

**Karnataka nung Khelo India
University Games 2021 asayatsü**

VOL. XVIII NO. 130 (ADOK 130) DIMAPUR

SANGTENNÜ (TUESDAY)

TSÜKLAI (FEBRUARY) 23, 2021

₹ 5.00

Nagaland sorkari petrol aser diesel nung tax ajemer

Dimapur, February 22 (TYO): Nagaland sorkari Hombarnü petrol, diesel aser tanga motor spirits nung tax ajemogo aser jenjang tasenbaji taonung ayaterm nungi benshitsü.

Nagaland nung tax reprangshiba sülen petrol litre nung Rs 2.22 aser diesel litre nung poisa 57 ajema akümtsü.

Hombarnü Finance Department-i sangdong ka nung ashiba agi, sorkari petrol aser tanga motor spirits litre

nung tax 29.80% agiba nungi 25% per litre ajemer ta ashi. Ibaji litre shia nung Rs 18.26 agia aliba nungi Rs 16.04 dang tax agitsü.

Külen, diesel litre shia nung tax 17.50% agiba nungi 16.50% agitsü. Ibaji litre ka nung Rs 11.08 agia aliba nungi Rs 10.51 dang agitsü, ta Additional Chief Secretary aser Finance Commissioner, Sentiyanger Imchen-i sangdong nung metetdaksüogo.

NFHRCC-i MLA Mmhonlumo Kikon dang kuli meshir

Dimapur, February 22 (TYO): IT & C, Science & Technology, NRE Advisor, Mmhonlumo Kikon-i assembly nung Doyang apu yangluba indang olen ka jembiba ajanga nübertem ratadaksür ta Nagaland Foothills Road Co-ordination Committee (NFHRCC)-i Hombarnü ashi.

MLA Mmhonlumo Kikon-i Doyang apuba yangludak semdangba aser contractor-i mapa inyakba indang osang tiyazü ashi ta jembisa saka bangdak Department-i iba mapa 70.66% inyakogo ta February 3, 21 nü Official Technical Report nung shia lir, ta NFHRCC-i tanü sangdong ka nung metetdaksü.

"MLA Mmhonlumo-i iba olen jembiba ajanga Naga nungeri Doyang apu yangluba atema ratateper, anungji pai iba bangdak Department-i agütsüba osangji tiyazü ta asüba kuli jangjatsütsüla. Külen,

Department-ia tekaratiba nung parnoki Technical Report agütsüba indang osang tejangja metetdaksütsüla" ta NFHRCC-isa ashi.

Chief Minister Office ajanga Finance department dang tzüngluruwa matongdang Foothills Road dak sendakba file reprangshimsü tetuyuba agütsüogo ta osang angazüker, anungji Chief Minister Nephiu Rio-i nüngdakba senotsü agütsütsü mepishir, ta parnokisa metetdaksüogo.

2013 küm iba otsütsütsü mapa tenzüksü atema CM Rio senotsü agütsü, ajisüaka pa mapang tatsüka malidang iba mapa nung tetsükdaksü ajurua liasü. Ajisüaka, N. Rio-i tanaben Chief Minister inyakba ajanga Naga nungeri nüngdakba Foothills Road anepalua reprangtsü tamang akar, ta NFHRCC-i ashi.

PM Modi-i assembly election agitsü osang metetdaksü

Guwahati, February 22 (Agencies): Election Commission (EC)-i March 7, 2021 tashi nung Assembly Election agitsüba osang metetdaksütsü akok ta Hombarnü Prime Minister Narendra Modi-i ashi.

Assam kübok Silapathar nung lokti sentong ka nung jembidang "2016 nung March 4 nü Assembly election agitsüba osangtem metetdakja liasü. Taküm EC-i March 7 tashi nung iba osang metetdaksütsü akok ta ni bilemer" ta PM Modi-i ashi.

"Election agitsüba anogoji EC-i metetdaksütsü, saka iba osang magütsü tashi ni akokba tashi Assam, West Bengal, Puducherry, Tamil Nadu aser Kerala semdangtsü" ta paisa shisem.

Taküm April aser May tsüngda Assam, West Bengal, Tamil Nadu, Kerala aser Puducherry nung assembly elections agitsü akok.

Tanü Modi-i Assam semdangdang oil sector indang mapatong asem den Dhemaji Engineering college lapoktsü.

Paisa Sualkuchi Engineering college yanglutsü atema lung azüngtsü.

"Ozü sorkari Sabka Saath, Sabka Vikas, Sabka Vishwas omen nung mapa inyakba ajanga Assam kanga renlok daksüogo" ta Modi-i ashi.

"Tesüiba Congress sorkari Assam nunger atema kecha meinyaktsü. Ozü sorkar akümba sülen, onoki Assam nung terenlok angutsü indang scheme aika tenzüksü aser communication sector tashi itdaksü. Onoki Assam aser Northeast nung apu aika den gari lenmang aika yanglutsüogo" ta paisa metetdaksü.

"North bank nung Dhemaji Engineering College ya mezüngbuba engineering college lir aser iba ya taoba sorkari senzüka yutsü" ta Modi-isa ashi.

WC, NNPGs-i Gol Interlocutor Ravi den senden amen



Dimapur, February 22 (TYO): February 20, 2021 nü Convener N. Kitovi Zhimomi-i anir WC, NNPGs-i Police Complex Chumukedima, Dimapur nung GoI Interlocutor R.N Ravi den ajuruteper.

Senden nung R.N Ravi dang Indo-Naga yimten latettsü atema onüktem jangjateper aser telok anaprongi telemteba tajung ka agitsü atema molungtep, ta Media Cell, WC, NNPGs sangdong ka nung ashi.

Tesüiba ita ishika telok balalai Naga kintem aser civil society tem ratadaksütsü atema media nung olulu aser taila osangtem prokshia arur. Tang ya Naga nunger atema dang masü saka India sorkar tendangba mapang ka lir. Mapang aika akoksaogo, saka Naga kintem aser civil society temi olulu nung mamangi alizüng ayuba nung rangloker inyaka aotsü amanger ta WC, NNPGs-isa metetdaksü.

"Prime Minister Narendra Modi-i anir India sorkari Indo-Naga yimten telemteba agitsü atema mapa inyaker. November 17, 2017 nü India sorkar aser WC, NNPGs tsüngda 'Agreed Position' sign asüba aser iba sülen jembitepa aruba kulikakettemajak yimjak nung lir, anungji itemji

reprangtsü akok. Onoki inyaka aruba miim tebilemba kecha mali. Telemteba agiba sülen Manipur, Arunachal Pradesh aser Assam nung Naga tesemtem atema inyaktü" ta parnokisa ashi.

"WC, NNPGs-i Nagaland nung Naga nunger atema dang inyaker kari Manipur nung Naga nunger mashileni anitsü meranger. Nagaland nung kin 14, NTC, NGBF, ENPO, CNTC, minority teloktem aser Myanmar dena tanga state tem nung aliba Naga nungeri inyakba nung ashishitepsü kecha mali. Naga National Political Groups tenet ya India sorkar aser Naga nunger tsüngda osang tongdar lir. Naga kin aser sobaliba ozüng amertemi shilem agia olemtep tembangogo, anungji olulu prokshiba nung mapang meindoktsüla" ta Media Cell sangdong nungsa metetdaksü.

December 26, 2020 nü Indian Army Chief Gen. Manoj Mukund Naravane den sensaksemba indang osang adok. Iba osang nung NSCN (K) lennir Gen. Niki Sumi aser Starson Lamkang dena parnok nisung 50 temai adokba indang shia liasü, saka ita asem süiaka Gen. Niki Sumi nungi iba atema osang kecha mali, ta parnokisa ashi.

Gen. Niki Sumi-i aniba telok den ajurutepeba civil society teloktemia iba osang tejangja mangazük. November 2020 nung Convener, WC, NNPGs-i Gen. Niki Sumi dang WC nung adentsü atema shidi ka zülü saka parnoki ibaji magizük. Naga nungeri Gen. Niki Sumi aser par telok kechi jenjang nung lir ta asüba ochi osang metetnür, ta Media Cell-isa metetdaksü.

"India sorkari October 31, 2019 nü yimten olemtep tembangogo ta jangjajangja metetdaksüogo. Anungji telok tasen ka den olemtep tenzüka mesüra iba atema ceasefire alibaji tim masü. Taoba Indian Army Chief Gen. Naravane-i jembiba onükji tiyazü masü aser iba jagi Interlocutor RN Ravi-i Gen. Niki Sumi temai adokogo aser tang parnok nisung 120 shi lir ta shiogo. Anungji temai adokba ketdangsürtem aser züngsemtemi Naga yimten latettsü atema inyaker nem mapa inyakdakjang" ta parnokisa ashi.

Gen. Niki Sumi-i anir par züngsemtemi tai maket nisungtem parnok telok nung adentsü atema memerangtsü mepishir ta WC, NNPGs-isa metetdaksü.

India sorkari ajak dena Naga yimten latettsü ta jangjajangja shiogo. Naga nunger ka akümsüba aser tanga mebeneti aliba onüktem democratic inakyim ajanga inyaka aotsü ta parnoki shiogo. WC, NNPGs-i Manipur, Arunachal Pradesh aser Assam nung aliba Naga nunger aser ali kümzüka ayutsü atema jembioogo aser ibaji GoI-WC, NNPG Agreement nung tongtipang shilem ka lir, ta Media Cell-isa metetdaksü.

COVID-19 Nagaland: Nisung 12 dang anepaludar

Kohima, February 22 (TYO): Deobarnü Nagaland nung nisung ka dak COVID-19 aliba putetba sülen tanü nisung shinga dak-a meputet aser nisung ka taneptsü angu. Iba ajanga tang anepalurtem nisung 12 dang kümogo.

"Hombarnü nisung shinga dak-a COVID-19 meputet. Külen, Kohima nung nisung ka taneptsü angu" ta Health & Family Welfare Minister, S Pangnyu Phom-i ashi.

"Nisung 12,192 nungi parnok 11,937 taneptsü nguogo aser iba ajanga taneptsü angur 97.90% lir," ta Health & Family Welfare Director, Dr Denis Hangsing-i ashi.

"Nagaland nung COVID-19 puteter nisung 91 asü saka parnok 10 bo tanga timtem ajanga asü. Külen nisung 152 tashi tanga state temi ogo" ta

paisa ashi.

"Tang anepalurtemji Kohima nung nisung 10 aser Dimapur nung 2 lir. Dimapur nung nisung ka dak dang shirangba yimya kar lir aser tanüngba nisungtem dakbo shirangba yimya kecha mali" ta Dr Hangsing-isa metetdaksü.

Taneptsü angurtem: Dimapur (6,338), Kohima (3,799), Mon (594), Peren (506), Tuensang (246), Mokochung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemba sample 1,29,228 tendangogo. RT-PCR ajanga sample 74,613, TrueNat ajanga 37,310 aser Rapid Antigen Test ajanga 17,305 tendang," ta Dr

Hangsin-isa ashi.

NISUNG 23,346-i COVID-19 VACCINE AGIOGO:

Nagaland nung nisung 21,481 nem COVISHIELD vaccine dose 27,764 agütsüogo.

Vaccine agirtem rongnung frontline workers 14,376 aser healthcare workers 8,970 lir.

"Healthcare workers rongnung parnok 4,418-i tanabuba dose agiogo aser parnok nem vaccination certificate agütsüogo" ta State Immunization Officer, Dr Ritu Thurr-i metetdaksü.

"Tang tashi nung vaccine agiba ajanga temang nung timtem ajuruba osang kecha mali. Külen, local aser national media houses nungi journalist 20-i vaccine dose mezüng agiogo" ta Dr Ritu Thurr-isa ashi.

Dr. Yingngam Wangnaolim nem tenüangsang agütsüba sentong ka agi



Dimapur, Tsüklai/February 22 (TYO): Dr. Yingngam Wangnaolim-i Medical Post Graduation nung takok tulu ngutetba asoshi Nagaland Governor RN Ravi ajanga February 22, 2021 nü Dr. Imkongliba Ao Hall, Raj Bhavan Kohima nung sentong ka ayongzüka tenüangsang agütsü.

Dr. Yingngam-i 2020 küm Kerala University of Health Sciences nungi Masters Course for Obstetrics and Gynaecology nung jenjang tasembuba nguteta liasü.

Dr. Yingngam-i temolungtetba tulu nung meranga inyakba ajanga takok tajung anguba asoshi Governor-i tenüangsang agütsü.

Tepetzük kibong ka nungi süaka temolungtetba den meranga inyakba lira tamakoktsü kecha mali, ta sayutetogo. La ya Nagaland nung lanurtem asoshi nükrangdong ka lir, ta pai ashi.

Governor-i la dang state nung

tejangraba aliba lanurtem asoshi shisa agütsü aser len sayur ka ama alitsü ajungshi.

Lai High School tem semdangtsüla, talisa yimdak yimtsüng nung alibatem, kaketshirtem ajurutsüla aser la takum nung ajangshibatam parnok den lemsatepa ajungmesotsüla, ta ashi.

State tejak tentettsüa lai takok tajung ngutetba aser Nagaland nung aliba nüburtem tenzüksü molungtetba atema Governor-i la nem tenüangsang agütsü.

Health sector nung ki-o-jen nungi tenzüka temelenshi tulu nungdaker, ta Governor-i ashi.

Küm ana tsüngta linük nüjiso ngur küm 75 ajungba benjong ajurutsü, aser iba mapang Nagaland nung aliba nüburtem health services tajungba alitsüla, ta Governor Ravi-i ashi.

Dr. Yingngam-ia la doctor akumtsü asoshi azüngba mapang ajangshibatam lemsatepa liasü. Governor-i la

nem tenüangsang agütsüba sentong ayongzüka atema pelaba lemsatepba mapang, "Asen takum nung aseni takok anguba atema dangari metetba ajanga asen molung achiba ama kecha mali, aser kü takum nung tanü anogo ya ka lir," ta lai ashi.

Lai takok ngutetba ajak asoshi Tsüngrem nem tenüangsang agütsü aser tsürabur, kinunger aser tembartemi yariba atema pelaba lemsatepa liasü.

Iba sentong nung tepela o jembiba mapang Minister, Health & Family Welfare, Shri Pangnyu Phom-i Dr. Yingngam ya Nagaland indang jala ka lir ta ashi aser state tejak tentetdaksüba asoshi pelaba lemsatep. Sentong nung Principal Secretary H&FW, Shri AS Bhatia IAS ajanga sentong nung metetbela mapang agi aser Commissioner & Secretary, Shri Mhabemo Yanthan IAS ajanga tepela ankep o jembia liasü.

Finance Department ajanga metetdaksür

Dimapur, Tsüklai/February 22 (TYO): Nagaland (Sale of Petroleum and Petroleum Products Including Motor Spirit and Lubricants) Taxation Act. 1967 (as amended) indang Section 3A kübok sub section

3 nung tashi agüja aliba amshia, state sorkari Act indang Schedule II indang Entry Serial Number 3 & 4 kübok shia aliba ama 'rate of tax' ya tsünglanglen agüja aliba ama amend asür:-

Sl. No.	Description	Existing rate of tax	Amended rate of tax
1	Diesel	17.50% or Rs. 11.08 per litre, whichever is higher	16.50% or Rs. 10.51 per litre, whichever is higher
2	Petrol and other Motor Spirit	29.80% or Rs.18.26 per litre, whichever is higher	25% or Rs. 16.04 per litre, whichever is higher

Assam Rifles temi mürekmeju mapa inyak



Dimapur, Tsüklai/February 22 (TYO): HQ IGAR (North) kübok Assam Rifles, Kohima Battalion ajanga February 21, 2021 nü nüngtugu Puliebadze Trekking Route, Jotsoma nung mürekmejuba sentong ka ayongzüka agi.

Iba sentong ya Jotsoma Youth Organisation aser Kohima district indang Jotsoma Nature Conservation & Eco Tourism den lungiemer ayongzüka liasü.

Aruya aliba Sekrenyi benjong asoshi renemshiba ka

ama iba Cleanliness Drive ya agia liasü.

Iba tesem jung jana-reja mürekba den külemi parnoki lenmang tezülen placard tapet tem inokja liasü.

Iba mürekmeju sentong nungya Jotsoma Youth Organisation tir Rokovizo aden.

Assam Rifles temi iba ama sentong tajung ayongzüka asoshi pai pelaba lemsatep aser tarutsü nung raliwalir temi iba lenmang müreka ayutsü amanger, ta ashi.

Chungtia nung International Mother Language Day mungogo

Dimapur, Tsüklai/February 22 (TYO): Ao Baptist Arogo Mungdang (ABAM) ajanga par dak sendaka aliba arogo ajunga dang International Mother Language Day amungtsü totuyuba agütsüba ama Chungtia Baptist Arogo kübok Child Education Department ajanga February 21, 2021 nü sentong temeja ka ayongzüka agi, kong kaketsü o zülur aser Ongpangkong Mungdang tongti zülur Aso Imsong ya tongti o jembir liasü.

Iba sentong ya 'Tetsu oshi ajanga kin ka longjemdaksur' (A nation is unified by mother language) omen nung ajemdaker agi, kong lanur aser tanur noklang aika Chungtia Baptist Arogo aser anasa aliba Sabangya Baptist Arogo nungi pei sobaliba sübusilemtsü tapensa agir arua dena liasü.

Tongti o kembir Aso Imsong-i sentong nung jembiba mapang tanü-asüng Naga nunger loktiliba nung tetsü oshi koda tongtipang ta asüba indang jembia liasü.

Tetsü oshi ajungkettsü aser wazüka amshitsü asoshi



Chungtia Baptist Arogo nung February 21, 2021 nü International Mother Language Day amungba mapang tanurtemi shilem agiba noksa nung angur.

ABAM ajanga temolung agütsüba atema tenüangsang agüja jembiba mapang, arogo iba ama tongtipang anogo amungba ajanga tarutsü anogotem nung Ao oshi wazüka amshitsü asoshi ibai tetenzüker ka asütsü imlar, ta Aso Imsong-i ashi.

Pei oshi ajungkettsü asoshi arogoi tongtipang shilem agitettsü, kechiaser amangbapur den timba tetsü oshi agi jembir, ta pai ashi.

Ajidang masü, arogoi mapang shia kaketsü tabu balala zülur, koba ajanga nüburtem anogoshi libaliru nung tetsü oshi amshitsü ajungmesor aser wazüka ayur, ta pai ashi.

Iba mesükba nung pai putu menden aser kaketsü tentet danga lanurtem dang Ao oshi shidak angazüa teti tetsü oshi jembitsü aser zülutsü ajungshitsüla, ta pai ashi.

Iba dak sendakba nung lanurtem, talisa jila balala nung

alirtemi aikatibl tetsü oshi mejembitet aser jembitsü aker, ta Aso Imsong-i sasaba olen ka ashi. Nisung kati pei tetsü oshi amadokra pei ayak samadaksütsü, ta pai ashi.

"Ne aser nai mejembi, mezülü aser mezüngra shibai jembitsü, zülutsü aser azüngtsü?" ta pai lokti ajungmeso.

Ao oshi kanga sensaker lir, ta nüburtemi mashi angatetba indanga pai iba sentong nung

jangjashitsü.

Ao oshi kodanga sensaker masü saka nüburtemi akhi tejen nisungtemi jembiba ojang memetet mesüra amadokba ajanga lir, ta pai ashi.

Anungji zülumen research agia zülutsü lanu putu mapa lir aser Ao oshi karbo tajungba kumdaksütsüla aser ibaji ajanga Ao oshi tali takar akumtsü aser tarutsü nung Ao oshi tsütsü tashi-temeteter tali adoktsü, ta pai ashi.

Iba sentong nung menden ya Walang liasü aser Chungtia Baptist Arogo indang Associate Pastor Youth, Kathyla ajanga Tsüngrem temoatsü jazüka sarasadem.

Sentong nung Chungtia putu menden nungi I. Wati Jamir aser Deacon L. Tali nati lokti ajungshi aser lanu putui tetsü oshi senzüka meyutsütsü asoshi ayongzüker.

Maneni tanurtemi sobaliba ken atenba, jilushi, Ao sangru züngtepba agi shilem agi, kong tsüraburtema dena liasü.

Sentong nung Chungtia Baptist Arogo indang Associate Pastor CED ajangabtepela o jembia.



Hombarnü Prime Minister Narendra Modi-i Assam kübok Dhemaji district nung Silapathar nungi online ajanga Rs 3,000 crore alangba totzü mapatongtem lapoktsüdang agiba noksa angur. Iba sentong nungsa PM Modi-i Dhemaji Engineering College lapoktsü aser Sualkuchi Engineering College yanglutsü atema lung azüngtsü. (Silapathar, February 22)

Totzü jenjang atuba anema Assam Congress-i tesashiba lungkak aiter

Guwahati, February 22 (Agencies): Petrol aser Diesel den tanga nüngdakba osettsüset nung jenjang tali atuba anema Assam nung Congress-i lungkak tesashiba aiter.

Anogo tanünübuba atonga Assam Congress lennirtemi anir züngsemtemi state kübok tesem aika nung Petrol aser Diesel den nüngdakba osettsüsettem nung jenjang tali atuba anema lungkak aitogo.

Guwahati nung Lok Sabha MP Gaurav Gogoi-i anir Congress-i lungkak ait. Iba lungkak aitba rally nung Gaurav Gogoi den Assam Congress president Ripun Bora aden.

"BJP Petrol Tax Loot mapatong ya nübur ajaki angatetogo aser iba jagi tanünübuba totzü jenjang tali atuba anema Assam Congress-i lungkak aitba nung nisung timbai shilem agir. Iba ama pei ajangzüksü dang bilema yimsü asüba inyakyim yagi joko nüburtem laktetogo aser tarutsü nung BJP yimsüsüba nungi Assam nung kümzüka yuner," ta Gaurav Gogoi-i ashi.

"BJP Petrol Tax Loot' mapatong yagi Assam nüburtem

joko laktetogo aser tanü Guwahati nung inyakba ama iba ya anema nüburtem yimdong nung lungkak aiter. BJP-i mejungi yimsü asüba aser Assam nübur asoshi mebilemi inyakba tatembang kati aruogo; aser yimjiyimjung den tesünap agizüksü asoshi Congress den State longjemer inyaksü mapang agi tonga aruogo!" ta Ripun Bora-ia ashi.

Assam CLP lennir Debabrata Saikia-i anir Sivasagar district kübok Nazira nung nüburtem lungkak ait.

Nazira kübok Lohaty Petrol Pump nung lungkak aitba mapang Congress züngsemtem aser nübur aikati shilem agia liasü.

"Totzü jenjang atuba anema Assam Congress-i longkak aitba maparen nung nübur aika atsüa arua tali tashitaitba odor. BJP-i Assam atema asalentong tamajung atongba anema Nazira Town kübok Lohaty Petrol Pump nung lisopur jenti adenshia lungkak aitba maparen tali akangashia odor," ta Debabrata Saikia-ia metetdaksü.

Congress lennir tejen aser

taoba mapang Lok Sabha MP Sushmita Dev-i BJP Sorkar ajanga mebilemdangi totzü jenjang tali tudaktsüba anema tasüngdangba agütsü.

"Kechiba BJP-i Assam nüburtem atema mebilemer? Tang ama tashiyim agi totzü den oset jenjang atuba mapang nübur tem pei kibong koda repringtsü/ mesütsü ta meshisadangi, totzü jenjang atuba atemer kechiba BJP-i taochi mesayui nübur dang nungi rakzükraktemer?," ta Sushmita Dev-i asüngdang.

Taoba mapang Assam Minister Rakibul Hussain-i, "BJP inyakyim ya tim masü ta angateta, Assam Congress-i anir totzü jenjang atuba anema lungkak aitba maparen nung tanü Kamrup nung lisopur aikati pusemogo" ta ashi.

Maneni, Lok Sabha MP Pradyut Bordoloi-i, "Nüburtem pei nüngdakba atema ang inyakteter asünung kechiba BJP-i külem telokpur indang juli nung sen semoktsür? BJP-i kechiba arok nüburtem taküm yamai timtemdaksür?," ta asüngdang.

Assam Rifles-i KYKL telungpur tetsür ka apu



Imphal, February 22 (Agencies): Manipur kübok Bishnupur district nung Assam Rifles-i telungpur telok Kanglei Yawol Kanna Lup (KYKL) nung tetsür züngsem ka apu.

Külen, Deobarnü Tengnoupal nung Assam Rifles-i sen lakh 64 alang ozüing alema

shibelenba oset aika apu.

Bishnupur indang Upokpi Market Shed tesem nungi KYKL telungpur (tetsür) ya apu, ta Assam Rifles-i Twitter nung metetdaksü.

"Assam Rifles-i mapang shia temolung agüja mita aoba ajanga Upokpi Market Shed,

Bishnupur nungi KYKL telungpur ka aser Deobarnü (21.02.2021) Tengnoupal nungi sen lakh 64 alang ozüing alema shibelenba osettem ngutet," ta parnoki ashi.

Honibarnü Manipur Police den Assam Rifles longjemer Churachandpur nung tesem ka mita aodang temesepba mozü shibelenka ka apu.

Iba teloki sen lakh 2.5 alang opium ngutet. Opium touzükji seret 3.65 liasü.

"Honibarnü (20.02.2021) Assam Rifles den police longjemer Churachandpur nung tesem ka mita aoba mapang temesepba mozü shibelenka ka apu aser pa ket nungi sen lakh 2.5 alang opium touzük seret 3.65 shi ngutet," ta Assam Rifles-isa Twitter nung metetdaksü.

AASU-i Centre aser State sorkartem anema lungkak aiter

Guwahati/Mangaldoi, February 22 (Agencies): Assam Accord nung Clause 6 mapa kuma meinyakba anema Hombar nungi All Assam Students' Union (AASU)-i lungkak aiter.

Tanü AASU-i state ajungalen Assam Accord nung Clause 6 mapa kuma inyakang ta takhangba agüja lungkak ait.

Guwahati nung AASU President Dipanka Nath-i anir züngsem 300 temai Dighalipukhuri nung mener lungkak ait.

"Ojang dang nangzükan, onoki mapa aginür" ta lungkak aitertemi ashi.

Assam Accord nung Clause 6 mapa kuma inyaksüba dang masü saka AASU-i Assam dak sendakba tebilemtsü onük aika atema ola adoker.

AASU züngsemtemi tzünoktang tulu, tzümetsüng aser ali anenzüka aoba onüktem atema jembi.

Mangaldoi nung AASU züngsemtemi ASTC campus anasa national Highway 15 nung lungkak ait.

BJP-i Centre aser State sorkartem anema yimyim ayima Mangaldoi nung AASU züngsemtemi Assam nung tzümetsüng aser ali anenzüka aoba ya 'national disaster' ka ta sangoktsütsü takhangba agütsü.

Gaurav Gogoi-i Amit Shah dangi shidi zülü AJP-i ULFA (I) dang chioktsü mepishir



Pranab Kumar Gogoi aser Ram Kumar (File)

Guwahati/Sivasagar, February 22 (Agencies): Assam kübok Kaliabor nungi Congress MP Gaurav Gogoi-i Union home minister Amit Shah dang Quippo Oil and Gas Infrastructure Ltd nung mapa inyaker nisung ana chioktsü atema mapa inyaksü mepishia zülüogo.

"ULFA (I)-i tena apuba atema Assam nungeri kanga aitsüogo. Tawa ULFA (I)-i tena tepsettsü ta osang sangoktsüogo. Iba tebilemtsü ya ulura lir anungji tena taküm kümzüksü atema ni nü dang tangasa mapa inyaksü ayongzüker. Sorkari tena taküm meyipa arutsü atema mapa inyaksüla" ta Gogoi-i shidi ka nung ashi.

Pranab Kr Gogoi aser Ram Kumar na December 21, 2021 nungi ULFA (I) aser NSCN ket nung lir.

Külen, Assam Jatiya Parishad (AJP)-ia Hombarnü United Liberation Front of Asom (ULFA) (I) dang totzü

company nung mapa inyaker nisung ana chioktsü mepishio.

AJP general secretary Jagadish Bhuyan aser party lennir aika tanü Pranab Kr Gogoi'er kidangi oa par kibong den ajurute.

"Assam nung tanga kija aser teloktem ama, onoki ULFA (I) dang meimchir meimba tangatetba nung tena chioktsü mepishir" ta AJP-i sangdong ka nung metetdaksü.

"Tangalen nungi arurtemi asen state nungi rongsen agir saka iba ama inyakyim anema timi lungkak aitsü lenmang lir. ULFA (I)-i iba inyakyim anema inyakdang tangar takümtem lendongi meidaktsütsü mepishir" ta parnokisa ashi.

"ULFA (I)-i Assam nunger ola akhümtsübuttsü ta onoki amanger" ta AJP-isa metetdaksüogo.

Tanü Bhuyan aser tanga ketdangsürtemi Gogoi'er kinungertem den osang lemsatet aser tejashi lemsatetba metetdaksü.



Hombarnü North Garo Hills district nung Meghalaya chief minister Conrad Sangma-i United Kharkutta Higher Secondary School ajungkettsü atema lung azüngtsüdang agiba noksa angur. Iba mapa ya Rs 4 crore shi endoka yanglutsü aser tanü CM Conrad-i school ketdangsürtem dang December 2022 tashi nungbo mapa tembangtsü ayongzüker. (Resubelpara, February 22)



TIR YIMYIM YIMOBILEM (EDITORIAL)

DIMAPUR SANGTENNÜ, TSÜKLAI (FEBRUARY) 23, 2021

Shiranger anepalurtem yabo balaka

Shiranger dak kongshia anepalutsübaji nisung aika asoshi jangratemtsü mapa kabo masü, aser ibaji anemsü agi inyaktsüba mapa ka masü, anungji nisung shirnoki shiranger anepalutsü atema medical azungtsü mulungtetter parnokjibo tangar dang nungi balaka temeim aser aria bilemba shisatsü aliba nisungtem asütsüla. Item jagi tesempatsü komo adoka aliba dena jungjunga shidoka anepalur aneptsütsü. Parnok asoshi shirangertemji tesempatsüka masü saka temeimtsüka, iba jagiang shirangertem yariba mapaji melaki inyaker. Ajisüaka, tanü Nagaland government mozü kitem nung inyakerkem aikati temulung magütsüba agi ajungben yiruyipong lendong ajururtem aser shirangertem mapang shitak nung teyari menguteti timtem takoksa anguba osang lir. Item rongnung Zunheboto district nung Primary Health Centre, Satoi nung yakanü Honibar nü gari lendong nung yiruyipongertem yaridaktsütsü asoshi bener aoba mapang, iba mozü kidang inyaker doctor aser nurse ka danga mali, parnok mapa ajakji proxy Incharge ka nem nungloka toktsür orr liasüba tensa tia jagi Nagaland government mozü kidang shiranger anepalutsü pur doctor aser nurse ajak tenüngmenütsüogo. Aji oda, tang tia junger majungka, Satoi PHC indang jembitsüsa atalok dang ashi, Nagaland nung Community Health Center aser PHC-tem dang masü saka District hospital-tem nung dena inyakerteri temulung magütsüba mapa aika alitsü. Item rongnungji Naga Hospital Authority, Kohima nunga azü tapu balala bendanga ayuba machine bener arua yur mamshiba ajanga, talisa azü cancer agi shirangertem balaka, pei lima nung pei kidang nungi sen aser mapang meindoki anepalutsü melen, koda masü, tangaleni yoktsüsa akümba otsü lir. Asenok temang nung azü ajema küma shirangdang mesüra operation agitsü asüadang, shiranger nem azü agütsür, saka azüji tangar dak nungi tuzükba azü to ajunga yamaji ser group dang putepa lira agitsüba masü, saka azü ya temerem, temesüng aser platelets, plasma ta tapu balala lir, anungji itemji bendanga balala ayur aser shiba koba azü nüngdaker, ibaji dang agütsür. Ajisüaka, asen lima nungbo ibaji malinungji, azü tapu ka agitsüba melen ajak agütsür, iba jagi shiranger nem teyari masü timtemang agütsür. Ano, tanü asüng kanga boluba tashidak kaji tezüng tashidak ya asütsü. Tezüng ya temang shilem rongnung tongtibang ka lir, kechiyong iba yagiang temang nung azü merüktetdaksür, anungji kodang tezüng mejunglir temang nung azü ajunga miim akümer aser iba jagi shirangerji yiar ama küma mangpumangyimdaksür. Iba ama tezüng timtemertem ya kibong aika nung lir aser parnok shirangertem anogo shia tzü alia tezüngji shidoktsüsa akümer, anungji aji private mozü kidang anepaludaktsü nungbo anogo nung sen aika adoker, iba jagi sensakertemibo makok, shirangerji repranga südaktsür. Iba tezüng shidokba machine-ji tangbo district hospital aika nung akatsü südi, saka tongtibangbaji iba dialysis machine amshitsü purtem jagi shirangertem meima anepalua amshir asü mamshir ta asübaji asütsü. Tesem aika nung government mozü kidang inyaktetsüba ser nung machine-bo lir saka kibur maliba oset ama mamshii ayur. Iba jagi sensakertem, shirnok pei sen agi oa private mozü kidang anepalu mesütetter, parnokjibo anojungi taküm tembanger. Item tiaji meteta government nung alirtemi teti pei constituency nung aliba mozü kitem nung shirangertem nüngdakba oset ali asü mali aser inyakerrema mozü kidangi temulung agüja arua inyaker asü meinyaker ta teti tenük yoka anepalutsüla. Atangji, Communitization ajanga asenok nem tashi agüja lir ser nung meinyaktetter dang ashi, government mozü kitemji Health Committee-i kibur küma reprangtsü tim. Ashiko, doctor karbo pei private mozü ki lapoka yur yangjiang temulung tagütsüba agüja inyakba agi government mozü ki atemabo temulung magütsür asütsüa akok. Ajisüaka, mozü kidang inyakerteri metettsüba kaji tazungdanga government sen agidang azüng aser züngtemer külen, tanüa ita sen den private nung meinyakba atema allowance tajung agüja government mozü kidang inyakdaksür, anungji rongsen talii mebushii nübortem meima government mozü kidang züngzünga inyaktsüla. Alima nung ya rongsen masü saka tepelasa tenüngdakba lir aser iba tepelaji asen mulungjang nung aliba temeim agi tangar yariba nungi angutsü.

OLEMSABANG

AOER JUNGLIR KIDONG TARENSEN

~ Jamir kidong senso T.N.Temjen Jamir, Mokochung

(Yashi adok nungi...)

(1) Salong Jamir chir-

1. Tzülansa (Anedong) Jamir
2. Mongkum Jamir
3. Longdangangpong Jamir
4. Ladong Jamir
5. Yimyangu Jamir.

(2) Anungdangsang Jamir chir-

- | | |
|-------------------|-----------------------|
| 1. Tzüwar Jamir | 2. Tamaibong Jamir |
| 3. Longri Jamir | 4. Sempo Jamir |
| 5. Nungdang Jamir | 6. Tenuk Tzüdir Jamir |
| 7. Tsüsa Jamir | 8. Ongshi Jamir. |

(3) Mosem Jamir chir-

- | | |
|---------------------|-----------------|
| 1. Lumongdong Jamir | 2. Mongka Jamir |
| 3. Metsübu Jamir. | |

1. Ungertsüba Jamir liasü.

(5) Majapirong Jamir chir-

1. Ojar Jamir

2. Olinger Jamir.

(6) Milong Jamir chir-

1. Lakhi Jamir

YA KODA ASÜTSÜ

Obou Chamiti Jamir aser Naresang Jamir par tebu tarensen aser narokum chungliyimti nungertemi par naro agutsüba/jatsüba tsürabur puti otsü metetba kar den aser par lipok otsü kakat nungi agizüka asüngdangteper yangi atoktsür. Anungji obou Chamiti Jamir aser Naresang Jamir dak nungi jakzükba semchir semnur Ao lima kwi ka nung lir ibai ken jungjunga shisadangdaksünür.

21.11.2020 anogo nung tsürabur Kumsangliba Sanglir aser Takumbuba Sanglir tena den mena Sanglir ya koma jatet ta ni asüngdanga liasü aser tenati yamai ashi, obou Longjakrep Jamir chir tasembuba Naresang Jamir liasü pa chir Yangkangnungba Jamir liasü. Obou Yangkangnungba Jamir chir Kimatsüng Jamir mapang obou Naresang narokum Sanglir aja ta ashi.

24.11.20 anogo 7:20 a.m nung I.Shilu.Yaden Aoer puti lipok otsü aika meteta aliba tsürabur ka den mena jembitepdang, ni pa dang Yadener-Yaden unger ya koda jatet ta asüngdangdang pai yamai shia liasü.

Obou Chamiti Jamir chir Tzüdiyong Jamir liasü. Otsüla Longkongla Pongentsür lar jabaso Songmaket Ozükum. Kodang Songmaket Ozükum asüba (death) osang obou Tzüdiyong Jamir-i otsüla Longkongla dang ashi, na (Tzüdiyong) "ochishiba" ta ashi. Aser otsü Longkonglai Songmaket Ozükum subotsü indang Tzüdiyong Jamir nem agutsü aser pai iba subotsü subor chungliyimti lima nung yar tsüngsanga senzü dang chungliyimti nungeri kanga dang subotsü agi azür, alima ajak yamoka yapanger ta ashi nung pa nu nungi Tzüdiyong Jamir dang "Yadener-Yaden unger" ta aja.

Anungji I.Shilu Yaden kena sensaksem dang obou Tzüdiyong jia obou Longjakrep Jamir semchir ta ajangajanga kudang ashi nung, aji oda chungliyimti nung alidang Tzüdiyong Jamir dangji Yadener-Yaden unger narokum agutsü/aja ta angateter.

Chungliyimti nung obou Tzüdiyong Jamir nem narokum aika aguja lir, aser aji oda nokinketer, walunir tajungtemi iba narokum ngua liasü sudi.

4.12.2020 nu ni Mopungchuket yimtibai tour Ozükum kidong nungi S.Pangyang Ozükum aser S.Temju Jamir par kidang atenshir jembidang S.Pangyang Ozükum-i yamai ashi,

1. Songmaket tebu Longkha Ozükum liasü ta ashi.

2. Pongmidong Longkumer kima nung Jamir tem jaoka subotsü agir tsüngsang dang 'Yaden aja' ta Mopungchuket sungkhum shi nungbo jembir ta ashi.

Tanü asen tendak nung asen chirnur semchir semnur atema asen tebou Longjakrep Jamir kidong taerensen shitakbaji zülua yutsütsü dang ya mapang tajung ta nibo shidanger.

Anungji Aoli Jamir kidong yim kwika nung lir iba kidong aser narokum tepilaji bentetbenteta ayutsüla/ajatsüla. Tarutsü nung asen chirnur, semchir semnur mangmangkora, tetsükdaktsü, tarendak keja makai jembitetsü tanu asenoki kakat ka nung zülua yutsü nung kanga ajungtsü ta shidanger. Iba lipok otsü lemsatepba nung metokmeperi, aibelena metongjemi kar zülua lira asen Jamir kidong ajaki metongshitepa azungtsü mepishir.

Ni ya asen junglir kidong dang shinur.

Aoer junglir kidong telongjem ka tenzük nung koma süaü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung tesünep atema Khristantemi sarasadema jajar



Myanmar nung sepaitemi linük lenir, Aung San Suu Kyi den lenirtem aika apuba anema February 21, 2021 nü Yangon nung Khristantemi yimdong süa longkak aitdang tangokba noksa nung angur.

February 22, 2021: Myanmar linük nung sepaitemi linük lenir, Aung San Suu Kyi den lenirtem aika apuba anema February 21, 2021 nü Yangon nung Khristantemi yimdong süa longkak aitba den külemi linük nung tesünep alitsü atema sarasadema jajaogo.

February 1, 2021 nü Myanmar nung sepaitemi linük lenirtem apuba sülen sepai yimsüsü sangdongba anema democracy pusemertemi longkak tesashiba aitba mapang ka nung February 21 nü Yangon nung nun tem, putirtem aser Khristantemi linük nung yimjung alitsü atema lenmang nung sarasadema jaja.

February 20 nüa Mandalay nung Khristan noklang aikati lenmang nung sarasadema jaja.

Taoba hopta nunga nun tem, putirtem aser Khristantemi linük nung tesünep alitsü atema Kayah state nung sarasadema jajaogo.

Catholic dang masü saka denomination balala nungi Khristanem longjemer Kachin aser Chin states na nung aliba yimtitem nung sarasadema jaja.

Yangon nung longkak aitertem nem nun temi chiyungtsü aser tajemtsü lema

agütsü aser convent kar nungbo sarasadem ayongzüka agi.

February 19, 2021 nü Catholic lanurtemi Yangon nung aliba US embassy nung longkak aita liasü aser China, Japan aser Singapore Embassies nunga lanurtemi longkak ait.

Myanmar nung Khristan nütsüng aika aliba tesem nung longkak aitba mapang nung Khristanem aikati shilem agiogo aser agidar.

February 20 nü Mandalay nung longkak aitba mapang nungbo lanur ana asü aser nisung 20 dak tem yirua liasü.

Longkak aitertem azüoktsü atema sepaitemi tashiyim amshiba atema United Nations, US, Britain aser European Union-i aitsüogo.

Yangon nung tongti putir, Charles Bo-i, "Iba mapang ya sarasademtsü mapang ka lir. Iba mapang ya lumitsü mapang ka lir. Iba mapang ya linük nung asenok ajak melenshitsü mapang ka lir," ta metetdakja liasü.

Catholic Bishops' Conference of Myanmar (CBCM)-i stakeholders ajak dang ken o jembitsü mepishia metetdaksü.

February 21 nü CBCM-i

sangdong ka ajanga, "Onok Catholic putirtemi tashi aliba ketdangsertem dang tazüokba alitsü aser ken o jembitsü atema mepishir," ta metetdaksü.

Iba sangdong nungji CBCM Tir, Cardinal Bo, Executive Secretary, John Saw Yaw Han aser linük tesem ajaklen nungi putirtemi sign süa lir.

February 9 nü longkak aitba mapang arrshi küm 20 tetsür ka dak tekolak nung injang agi khashiba sülen February 21 nü la meküzmzükteti asü; la den asüpila sentong February 21 nü Naypyitaw yimti nung agiogo.

"Yimti yimdong nung lanurtem asüba ya linük melungsentsü nung zübo ka lir. Temeshi li ya azü nung memetendaktsüsüla," ta CBCM sangdong ajanga metetdaksü.

"Stakeholders ajaki ken o jembitsüla aser taneptsü angutsü atema pua aliba lenirtem tama chioktsüla," ta parnokisa metetdaksü.

Yangon nung aliba Assistance Association for Political Prisoners teloki ashiba agi, tang tashi nung sepaitemi longkak aiter 640 shi puogo, kar anema ken o benokogo aser kar anemabo obendang agütsüogo.

ANOGO ABEN TSÜNGREM DEN

Teyari tanga leman mali

1 Yohan 1:1-10

Ni kü menen ne nem metetdaksür aser ni kü tai miima mayu; ni ashi, ni ozüng raksaba Kibuba dang nangzüksü; aser kü temenen tai nai atok. T. Ken 32:5.

Tenünsang Ken 32 nung Dawidi pa tsükchir number ka ken raratepba indang pa aibilen aser timatemba indang ashir. Pai atsükshishiba asaya, saka iba jagi kecha meinyaktet. Pai pa menen tangar nungi miima yutetter alitsü akok, saka pai aji Tsüngrem nungi miima yutet asü? Idakji jenbutsü leman ka lir: "Ni Kibuba dang kü aibilen nangzüksü," ta Dawidi ashi. Idangji Tsüngremi pa aibelenba temenen tai atok.

Asenok aibelenba tebilemtsü nungi jenbutsüba lemanji ibai dang lir. Metetsümonga asenoki ibai yi mesepba mesüra drug agi miimbangtsü meranger mesüra inloktsü meranger. Kecha agi mapa meinyaker; aibelenli teti temulungjang nung teti arishir aser tejashi, shisabulu aser tetsübu bener arutsür.

Dawid atema teyari lemanji ka dang liasü: ochi, ajak rakpoka nangzükbä. Miimshiba mali, mesüra tangar tangloktsüba mali saka tongmelang: "Ni kü aibelen Kibuba dang nangzüksü." Ibaji mera number one. Mera number two tali tongtipangba: Dawid ama amangtsüba, "Nai kü temenen aibelen tai tokago." Asenoki Tsüngremji ochi tera ka ama dang metettsüba masü saka Paji temeim Tsüngrem ta metettsüla- tatok agütsüba Tsüngrem kati Khrista nung Pa taochi osangtajung agi aser pelashishia ajar. Khristai asenok asoshi melenshitsüogo ta amanga asen aibelenba ogo ta asenok pelaa alitsü akok.

Ne tekümtet tepela nung, Kibuba, kü nela tesünep angur.

Building ka nung Khristan, Muslim aser Yihuda nungeri külemi külemtsü

February 21 (Agencies): Germany yimtiba, Berlin nung akhidang East Germany communist yimsüsürtemi raksatsüba Tenla ki ka kimong nung building ka yanglua iba building nungji Khristanem, Muslim nunger aser Yihuda nunger atema tekülem ki balala yanglutsü; iba building dangji "Churmosquagogue" ajatsü.

"Churmosquagogue" oren ya Church, Mosque aser Synagogue nungi agizükba lir.

Berlin nung House of One yanglutsü atema May 27, 2021 nü foundation lung azüngtsütsü. Iba building ji Pound sen million 47 indoka yanglutsü aser building ji Berlin architects Kuehn Malvezzi-i design asü; iba building nungji Tenla ki ka, Mosque ka aser synagogue ka alitsü aser ajak atema senden amentsü takdang ka alitsü.

Iba project tenzükbä nung yariteper Khristan Laishir, Roland Stolte-i, "Onoki sarasademtsü aser angazüksü atema building ka yanglunüa

liasü, kong tamangba yimsü asempronglai peipei maitsü benshiyonga külemi longjema alitsü," ta metetdaksü.

Yihuda nunger tesayur, Andreas Nachama-i, "House of One nungji Khristanem, Muslim nunger aser Yihuda nungeri külemi külemtsü, ajisüaka tamangba yimsü dak sendakba sodi anogotem, sentong balala aser benjungbentsü nungbo kati ka semdangteptsü," ta metetdaksü.


"Iba putu ya tamangba yimsü balala tsüngda tesempa maliba putu ka ta sayuba putu ka tetenzüker asütsü," ta paisa metetdaksü.

House of One ya akhidang 2nd World War mapang nung raksatsüba aser 1964 küm GDR ketdangsertemi bendoktsüba St. Peter Arogo Tenla ki kimong nung yanglutsü.

Iba building yanglutsü atema Berlin state aser Federal sorkari Pound sen million 30 agütsüogo aser tenla million 9 aru aser ano maneni million 8 nüngdaker.




Arogo inyakyim dak sendakba nung shi aser tanüla nung tangazükba agütsütsü nükjidong nung Chakhesang Baptist Church, Ministers' Hill Kohima(CBCMHK)-i tanü Arogo nung tenzükertem atema Orientation & Fellowship sentong ka ayongzüka agiogo. Tanü sentong shilem ana küma lemsar agi aser iba sentong nung Pastor staff, Deacon Board, Department(s) & Committee(s) züngsemtem densema Arogo nung tenzüker ajak dena liasü. Shisalen agütsürtem rongnung Sr. Pastor, Rev. Dr. Vevo Phesao Pastor, Rev. Dr. Wepre Mero, Church Advisor Rev. K. Luruo, Church Council Chairman Vevo Sapuh, Deacon Er. Zuvehu Vero, aser Deacon Nelhipe Mero nunger densema liasü. Noksa nung sentong tembangba sülen shilem agirtem tangokba angur.

OLONG PAITEP # 5733

TIPIEN		LANGTSÜNGLEN	
1. Inyaker ajangtetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Reprangzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashioktsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

OLONG PAITEP # 5732 TELANGZÜBA

TIPIEN :	LANGTSÜNGLEN :
1. Telok, 4. Aluru, 6. Ozüng, 8. Emk,	1. Tenükjang, 2. Luden, 3. Kiooktsü,
9. Kin, 10. Teti, 12. Süir, 13. Jen,	5. Lenti, 7. Tajangzük, 11. teronem,
14. Ola, 16. Talak, 17. Mazük.	12. Sempa, 13. Jahaz.

**TANÜBO NAI LANGZÜANG**

Q. Koba küm World Day of Social Justice mezüing amung?

A. 2009 B. 2008 C. 2007 D. 2006

===== (Taruba adok nung onoki langzütsü)

YASHI ADOK TELANGZÜBA : 2012



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela
Tasoba Anogo



1. Tenüing :

2. Tasoba anogo:

3. Küm : 4. Class :

5. School :

6. Talidak :

7. Salem osang :

NAI-A YA METETTER MA?

1968 nungi 2021* tashi Australian Open Men's Single title timtiba koker alirtem

Novak Djokovic	9	Roger Federer	6
Andre Agassi	4	Ken Rosewall	4
Mats Wilander	3	Pete Sampras	2
Boris Becker	2	Ivan Lendl	2
Stefan Edberg	2	Johan Kriek	2
Guillermo Vilas	2	Jim Courier	2
John Newcombe	2		

SUDOKU # 5775

			3			1			7	8	4	2	1	9	6	3	5
6	7	1				2		5	2	9	3	6	7	5	8	1	4
					2				6	1	5	3	8	4	9	7	2
2	8	3	7	6	4		1		8	2	1	7	5	6	3	4	9
4	6	7		9			2	3	9	3	6	1	4	2	5	8	7
	5		8	2		4	7	6	5	4	7	8	9	3	2	6	1
	9	2	4				5		4	6	8	9	2	7	1	5	3
	1			3		9		7	3	7	2	5	6	1	4	9	8
5	3	4			9		8		1	5	9	4	3	8	7	2	6

OJANG LUTEP # 5321

HISA	:								
MBAEETT	:								
SMTTPEEEM	:								
MÜBAAS	:								
UNNG	:								
EISÜM	:								
AHITSK	:								
NGUN	:								
AITMHSSÜ	:								
ERMAANNNGG	:								

OJANG LUTEP TELANGZÜBA # 5320

TERATETBA TAJUNG ALIBA JAGI LENMANG AISÜ
NUNG ASENOK NUNGITA YARIR

TAN HOPTA ATEMA - KOMA SÜLA ?

Q. Ao oshi renloktsü atema Aor kibongtem nung teyaritepertem tangar kin nungi masü Aotsür Aortem dang ayu nunga koma süla?

Olong 20 shi nung February 26, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Kolkata, February 22, 2021: Hombarnü Kolkata nung state Health Minister, Chandrima Bhattacharya leniba nung Trinamool Mahila Congress (TMC) züngsemtemi Centre sorkari totzü jenjang kanga atuba anema nashi-scü agi yangluba cake amer longkak aitba noksa nung angur.

Dadra & Nagar Haveli MP, Mohan Delkar hotel ka nung soseta asü

Mumbai, February 22 (Agencies): Dadra & Nagar Haveli nungi tenetben tashi Lok Sabha MP, Mohan Delkar Hombarnü Mumbai nung aliba hotel takdang ka nung soseta sür lia nguogo, ta Mumbai police-i metetdaksü.

Police ketdangseer kati, "Delkar-i pasasa lisü agi tekong nung alenseta asü," ta metetdaksü.

Hotel takdang nungji pai soseta asüba shidi-a ka zülua toktsür liasü.

Police ketdangser kati, "Yasüng Delkar hotel jagi arua liasü. Pa takdang anasa takdang ka nung pa gari anisang mejang. Tanü pai pa takdangji aiben lapoktsü

merang saka melapoktetba sülen pai hotel nung inyaker ka dang iba osangji metetdaksü. Iba sülen takdang tesülen nungi takdang telung jagi atu nung Delkar alenseta sür lia angu," ta metetdaksü.

Delkar tasü mangji Hombar nikongdang 2:00 ako meta angu, iba sülen tasü mangji post-mortem agitsü atema bener ao, ta police-i metetdaksü.

Arrshi küm 58, Delkar-i pa kinüngtsü den tanur ana toktsür asü.

Delkar-i 1989 nungi 2009 küm tashi Dadra & Nagar Haveli Lok Sabha menden nung trokben tashi takok ngua liasü; iba sülen 2009 aser 2014

küm elections nungbo takok mangu. Tesüsa 17buba Lok Sabha election nung pai kasa menden nungisa Independent candidate ama toktepa takok ngua liasü.

1989, 1991 aser 1996 Lok Sabha elections nung pai Congress party ticket nung toktep aser 1998 küm BJP nungi toktepa takok angu. Pai tanaben Congress nung adenba sülen 2009 aser 2014 küm nunga tamakok ngua liasü.

Pa ya Lok Sabha nung Standing Committee on Personnel, Public Grievances, Law & Justice nung züngsem aser Consultative Committee, Ministry of Home Affairs nunga züngsem liasü.

West Bengal-i temelenshi atema telemtetba agiogo: PM Modi

Kolkata, February 22 (Agencies): West Bengal nung assembly elections agitsü mapang ana nung lia Hombarnü Ato kilonser, Narendra Modi-i, state nung nüburtemi temelenshi alitsü atema telemtetba agiogo, ta metetdaksü.

Hooghly nung election nüboyim sentong ka nung jembidang pai, West Bengal nung Bharatiya Janata Party (BJP) sorkar arutsüji sorkar melenba dang masü saka temelenshi alitsü atema nüngdaker, ta ashi.

"Asen lanurtemi temelenshi imlar, anungji West Bengal nung BJP sorkar nüngdaker," ta pai ashi.

Mamata Banerjee-i aniba Trinamool Congress sorkar aija pai, Cyclone Amphan-i West Bengal kongshiba sülen Centre sorkari relief atema sen crore 1,700 yokogo, ajisüaka state sorkari iba nungjagi sen crore 609 dang indok, ta metetdaksü.

Tanüngba sen crore 1,100 ji TMC-i auyazüka agiogo, ta shia Modi-i, "Ibaji ajanga TMC sorkari West Bengal nung s e n s a k e r t e m ,

nüngdakhapurtem aser tetsürtem atema bilema maliba kuli sayur," ta ashi.

"BJP sorkari state nung terenlok atema industrial mapatong nung temelenshi benoktsü. Terenlok keraa alitsü atema onoki telemtetbatem tekaraba nung agitsü," ta pai ashi.

West Bengal nung nüngdakhapur lakh aikati Ayushman Bharat kübok angati treatment agitsü atema sen lakh 5 magitet; Mamata-i aniba sorkari Bengal nüburtem aser terenlok tsüngda tetsüdaksü balala agütsür, ta pai ashi.

Amarinder leniba nung Congress-i Punjab election nung tokteptsü

Chandigarh, February 22 (Agencies): Hombarnü Punjab Congress Tir, Sunil Jakhar-i, sangküm Punjab assembly elections nung Chief Minister, Amarinder Singh leniba nung party-i tokteptsü, kechiyong tawa civic body elections nung party-i takok tulu anguba ajanga state nüburtemi pa lenisüba nung tamang akaba kuli sayuogo, ta metetdaksü.

Tawa civic body elections nung Congress-i municipal corporations menden 8 nungi 7 tashi nung takok ngua liasü aser municipal councils nunga menden aika nung takok angu.

Chandigarh nung sentong ka nung jembidang Jakhar-i, "Civic body election nung Congress-i takok tulu anguba ajanga state nung Amarinder' Singh lenisüba nung tamang akaba kuli sayuba den külemi Punjabi nungeri tarutsü nunga pa lenir südaksünüba kuli sayur," ta metetdaksü.

State Congress-i "Captain for 2022" mission tenzükogo, ta shia Jakhar-i, taruba state assembly election nung Amarinder leniba nung party-i tokteptsü, ta metetdaksü.

Smart City aser AMRUT schemes kübok Chief Minister-i sen crore 1,087 indang terenlok projects aika tenzüksüba sentong nung jembidang

Jakhar-i, koda masüba tensa aika nung Amarinder Singh-i state junga aniogo aser pai inyaktetba mapatemji nüburtemi kanga junga meteta lir, ta metetdaksü.

"Tang Punjab nung timtem aika ajangshidar-Covid wara, aluyimba ozüngtem anema aluyimertemi longkak aitba aser Centre sorkari state dang m e k e t m e s e n b a tayongzükbatem lir, ajisüaka Amarinder Singh dak mangdang tajung aliba aser lenisütsü sempet aliba ajanga state junga anidar," ta state Congress Tirisa metetdaksü.

Centre sorkari Punjab dang meketmesenba atema aija Jakhar-i, state sorkari aluyimertemi longkak aitba pusemba agi Centre sorkari rongsenkettsüng tenokdangba densema state nem temerenshi balala agütsür, ta ashi.

BJP-i aniba Centre sorkar kübok linük nung federal inyakyim amokmeren tia nung lir, ta pai ashi.

Taoba mapang Gurdaspur nungi MP, Jakhar-isa Chief Minister dang, taruba election atema Congress manifesto nung Amritsar ya Vatican yimti ama alima nung yimti tajungtibatem rongnung dendaktsütsüsa inyaktsü atema nangzüksü mepishi.



February 22, 2021 nü New Delhi nung Indian Youth Congress (IYC) züngsemtemi linük nung gari totzü jenjang kanga atuba aser climate activist, Disha Ravi apuba atema Centre sorkar anema longkak aitba noksa nung angur.

Puducherry nung Narayanasamy-i aniba Congress sorkar chirepogo

Puducherry, February 22 (Agencies): Hombarnü Puducherry nung Chief Minister, V Narayanasamy-i aniba Congress sorkari assembly nung züngsem peria mesayutetba sülen legislative assembly Speaker, V P Sivakozhundhu-i, sorkari nübo peria mesayuteter ta sangdonga liasü.

Iba sülen Narayanasamy den Cabinet züngsemtemi Lieutenant Governor (additional charge), Tamilisai Soundararajan ajurua menden nungi anenba shidi agütsü.

Tesülen osangbenertem den jembidang Chief Minister-i, pa den cabinet züngsemtem, Congress aser DMK MLA tem aser independent MLA temi menden nungi anenba shidi lieutenant governor nem agütsüogo, ta metetdaksü.

Hombarnep assembly nung jembidang Narayanasamy-i, BJP-i aniba Centre sorkar, taoba

mapang lieutenant governor Kiran Bedi aser opposition party temi Congress sorkar atsüngdoktsü atema aiben meranga liasü, ta aitsü.

"BJP-i aniba Centre sorkari state aika nung nüburtemi shimtetba sorkar atsüngdokogo, ajisüaka parnoki Rajasthan nungbo tamakok angu. Parnoki Puducherry nunga nüburtemi shimtetba sorkar atsüngdoktsü meranga aruogo," ta pai ajembia liasü.

Tesüiba anogo 30 tsüngda Congress MLA 5 aser Congress pusemba DMK MLA kati anena liasü. Yaküm Congress MLA, N Danavelu bo anenja liasü. Tang Congress party MLA 9 dang kümogo aser parnok pusemer DMK MLA ana aser independent ka dang lir.

Ano külen assembly nung All India NR Congress MLA 7 aser AIADMK MLA 4 lir. BJP nung inyaker asem MLA shimogo.



New Delhi, February 22, 2021: Hombarnü New Delhi nung Defence sector nung budget lemzüksüba dak sendakba sentong ka nung Defence Minister, Rajnath Singh-i jembiba noksa nung angur. Kasa noksa nung Chief of Defence Staff (CDS), General Bipin Rawat, Defence Secretary, Dr Ajay Kumar aser Secretary (Defence Production), Raj Kumar nungera angur.

Myanmar nung sorkar atsüngdokba anema longkak aitba manener



Mitkar tashi amshia sorkar atsüngdokba anema Mandalay, Myanmar nung Mandalay Railway Station anasa nûburtem adenshia longkak aitba noksa nung angur. Mitkartemi tashiyim amshia February 1 nü sorkar atsüngdokba anema Myanmar nung longkak aitba tuluba akumer aser kasa mapang mitkartemi longkak aiter azükotsü meranga tashiyim amshia azüdokshi tali akümtsü südi, ta aikati ashir.

Naypyitaw, Tsüklai/February 22 (Agencies): Hombarnü Myanmar police temi linük yimtiba, Naypyitaw nung longkak aiter arishi tenzükogo, aser mitkartemi tashiyim amshia sorkar atsüngdokba anema linük tesem ajungalen business tem shibanger.

Sorkar atsüngdoker hopta asem jungaka February 1 nü mitkar tashi amshia sorkar atsüngdokba meyipjang aser lenir Aung San Suu Kyi pua aliba chiokang ta anogoshi

takhangba agütsüba aser civil disobedience movement tenzuka aliba mitkar lenurtemi menokdangteter.

Hombarnüa linük north tsütsü China den arrtsülen nungi central plan, Irrawaddy ayong aser southern tsütsü tesem ajungalen jila aser yimitem nung longkak aita liasü.

Naypyitaw yimti nung longkakbaitba nûburtem aridoktsü asoshi police indang water cannon aser danga gari aika amshiba noksa social

media nung nguogo, kong mitkar indang headquarters amenoka lir. Longkak aiterem arishiba mapang police temi parnok arishia ao aser karbo ali nung melangketa liasü.

Longkak ait tenzükba sülen longkak aiter nisung asem tepsetogo, ana Deobarnü Mandalay nung kaset aser mezüng asüba tetsür ka asoshi Deobarnü Naypyitaw nung asüpila sentong agidang nisung noklang aika adenshia liasü.

(Maneni tapak 9 nung...)

China-i US den tesendaktep yanglushitsü mulunga lir

Beijing, Tsüklai/February 22 (Agencies): Chinese diplomat Wang Yi-i Hombarnü ashiba agi, United States aser China na tsüngda tesendaktep raksar aliba yanglushira tzümopung melenshiba aser coronavirus amala ken o balala nung longjemer inyaktettsü.

Chinese state councillor aser foreign minister Wang-i, Washington den tesendaktep yanglushitsü atema Beijing renema lir ta ashi, koba taoba tir Donald Trump lenisüba kübok kanga mejungi aküm.

Wang-i Washington dang China nunger osettsüt nungi tariffs agintsü aser China nunger tech sector tashi meiti

kümdaktsütsü merangba toktsütsü ayongzük. Item jenjang agiba ajanga tesendaktep junga yanglutsü atema lenmang lapoktsütsü, ta ashi.

Wang-isa Washington dang China tejangrabatem akhümtsübuttsü, tang yimsü süa aliba Communist Party aitsü anentsü, Beijing telung ken o nung mejushitsü aser Taiwan nüjiso atema jenjang magitsü mepeshia liasü.

Tawa China tir Xi Jinping aser US tir Joe Biden na sendaktepba ya jenjang tajung ka lir ta Wang-i ashi.

Washington aser Beijing na shishilembaba tsütsü, Xinjiang tesem nung Uighur Muslim

nunger anema inyakba atema US-i ashishiba aser Beijing-i South China Sea amokbangtsü merangba ajanga mangatettep adoka lir.

Biden administration-i, parnoki maneni Beijing nongshitsü ta temaitsü sayuogo. Biden-i, shishilembaba tsütsü China inyakyim meshidakba aser Xinjiang nung China-i kin ka samatsütsü merangba atema tebilemtsü kaa bilemba lemsatepogo.

Ajisüaka Biden-isa, climate change aser North Korea nem nuclear weapon toktsütsü atema mepeshitsü asoshi longjemer inyaksü jangraba lemsatepogo.



Christchurch, New Zealand nung 2011 küm menoknok anoker küm 10 ajungba anogomung sentong nung nisungtem adenba noksa nung angur. Küm ter tejakdang tanü anogo New Zealand nung menoknok tesashi anoka nisung 185 taküm samatsü.

UN refugee agency Rohingya nunger kümzüktsü ayongzük

Geneva, Tsüklai/February 22 (Agencies): United Nations (UN) refugee agency-i Hombarnü, Andaman Sea nung taolen maka aliba Rohingya nunger refugee telok ka kümzüktsü atema ayongzükogo. Item refuuee tem aika tachi tajemtsü makaba tem temang nung timtem adoker lir.

Agency-i ashiba agi parnok rongnung karbo süatoker alitsü ta amanger. Iba rong ya Bangladesh nung Cox's Bazar tesem anogo 10 tejakdang toktsür apuso ao aser rong nung engine timtem adoker lir.

"Refugee tem apongda aliba tesem tejangja memeteti aliba mapang ka nung onoki iba temeket nung aliba linüktem nem osang agütsüogo aser parnok dang takaratiba nung teyari agütsütsü mepeshia asüngdangogo," ta UN High Commissioner for Refugees (UNHCR)-i ashi

"Taküm kümzüktsü atema aser lendong tamajungba ataloktsü aliba nungi jenbotsü asoshi tangsa tang jenjang tapet

agitsü nüngdaker," ta kasa sangdong ajanga ashi.

Indian coast guard ketdangser tejen kati ashiba agi, iba rong ya Andaman and Nicobar asetkonglen apongda aliba jangjaogo saka rong nung alirtem jenjang memetet.

Myanmar nungi jenshiba Rohingya nungertem ya Malaysia aser Indonesia atongtsü timla nung rong tamajung nung mener jenshidar.

2017 küm Myanmar security forces-i amakba sülen Rohingya nunger meyirejang aika Bangladesh-i jena ao, kong parnok million ka shi refugee camp tem nung mapa manguba den sorkar temelaba makai iba tesem toktsür moteti litepdar.

Bangladesh nung ketdangsertemi ashiba agi, camp toktsür rong apusoa aoba indang parnoki mejangjai liasü.

"Ibala osang angazükra onoki parnok soter lila," ta Cox's Bazar nung amendaker aliba additional police superintendent Rafiqul Islam-i ashi.

Telungpuri Pakistan nung tetsür aid worker kaset

Islamabad, Tsüklai/February 22 (Agencies): Pakistan northwest tsütsü North Waziristan district nung tenük yoker amakba lendong ka nung development worker tetsür pezü tepset, ta police temi ashi, kong mapang ka Pakistani Taliban indang headquarters liasü.

Iba lendong ya Mir Ali jila nungi anüdoklen kilometer ishika pilar Ippi yimtsüng anasa Hombarnep 9:30 ako meta atalok, ta police tanishir Shafiullah Gandapur-i telephone ajanga osangbener dang ashi.

Mejangjaba nisungtemi aid worker tem mena aliba gari nung injang khaloktsü aser jena ao, ta pai ashi. Iba lendong nung gari anisang yiru aser anasa aliba mozüki ka nung anepalur.

Iba tesem nung development worker anema amokmerenba lir asü, ta asüngdangba mapang, "Ibai telungpur agi sünga aliba district ka lir, aser lendong ajaklen lir. Aser tribal pur yimsü nung tetsürtem sadem-sadema senzür, koba aikati magizüker," ta Gandapur-i ashi.

Mapang ka North Waziristan ya Tehreek-e-Taliban Pakistan (TTP, koba dang Pakistani Taliban ta ajar) indang headquarters liasü, koba 2007 küm Pakistan sorkar atsüngdoka tamangba yimsü nung shia aliba sorkar ka tentettsü nükjidong liasü.

TTP kübok tetsürtem sadoksayima senzüsembongba

azüok aser non-governmental organisation ajanga terenlok mapa inyakba timbaka nokdanga liasü.

Mitkartemi operation balala agiyonga aruba sülen 2014 küm Pakistan mitkartemi North Waziristan nung TTP anema kanga sashia apusoa iba telok lenirtem Afghanistan anüdoklen jenok aser Pakistan litsü nung par inyaksangshi ajema akum.

Iba sülen North Waziristan nung azüdokshi kanga ajema akum, saka TTP temi mapang shia civilian aser security forces dak tenük yoker lendong agüja aru.

Taoba küm nungi North Waziristan nung tenük yoker lendong agütsüba tali akum, kong rara ajanga tesem balala nung jenshia aliba nisungtem küm aika lir meyipa shilanga liasü.

Taoba küm nungi iba district nung lendong agüja aruba mapang kin balala lenirtem, security forces aser dangartem 58 dak tema tepset, ta osang ajanga ashir.

North Waziristan district nung Hokulbarnü khatepba mapang sepai ka aser kiralongrar ana asü, ta mitkartemi sangdong ka nung ashi.

Hombarnü lendong atalokba sülen police temi iba tesem ya lungbanger mita bushiba mapang lir, ta police tanishir Gandapur-i ashi.

Microsoft-i Surface Pro 7 Plus den Surface Hub 2S 85 saya



Microsoft

Surface Pro 7+

specifications

91

mobiles

12.3-inch PixelSense display

11th-gen Intel Tiger Lake CPU

Up to 32GB of RAM

Up to 1TB of solid-state storage

New Delhi, Tsüklai/February 22, 2021 (Agencies): Hombarnü, Microsoft-i Business atema 'Surface Pro 7 Plus' aser 'education' atema Surface Hub 2S 85 India nung sayaogo. Taküm küm tetenzüklen, Surface Pro 7 Plus ya alima tesem ajungalen sayaa liasü, kong Intel indang Tiger Lake CPUs, RAM timba aser optional LTE variant dena lir. Ano külen, Surface Hub 2S 85 nung 85-inch large display aser onboard sensor tem inoka yanglutsüogo.

India nung Microsoft Surface Pro 7 Plus - 11th-generation Intel Core i3 CPU model den 8GB RAM + 128GB storage jenjang sen 83,999 aser 11th-generation Intel Core i7 CPU den 32GB RAM + 1TB SSD storage model jenjang sen 2,58,499 alitsü.

Microsoft Surface Hub 2S 85 jenjang sen 21,44,999 asütsü.

Microsoft Surface Pro 7 Plus nung Windows 10 Pro dena lir aser device nung 12.3-inch PixelSense Display den 2736x1824 resolution aser 3:2 aspect ratio, 10-point multi-touch den 267ppi pixel density angutsü. Surface Pro 7 Plus Wi-

Fi model ya 11th-generation Intel Core i7-1165G7 processor ajanga achayangtsür aser LTE variant nung 11th Generation Intel Core i5-1135G7 CPU dena lir. Intel Core i3 aketba of the Surface Pro 7 Plus model nung Intel UHD Graphics, aser Core i5 den Core i7 model nung Intel Iris Xe Graphics inoka yanglutsüogo.

Wi-Fi variant nung 32GB RAM aser LTE option nungbo 16GB RAM dang angutsü. Storage tsütsü reprangdangra, Wi-Fi model - Surface Pro 7 Plus nung 1TB removable SSD storage aser LTE model nung 256GB removable SSD storage angutsü. Pro 7 Plus nung 8-megapixel rear-facing camera den 1080p full-HD video capability aser tejaklen 5-megapixel front camera den 1080p recording dena lir.

Surface Pro 7 Plus den, Microsoft-i 'data retention' maparen atema removable SSD solution agütsütsü renema lir.

Microsoft-i ashiba agi, business aser educational organisation indang security aser privacy tsütsü nungittsü

atema iba solution tasen agütsür. Connectivity tsütsü reprangdangra, Microsoft Surface Pro 7 Plus nung Wi-Fi 6, Bluetooth 5.0, USB Type-C port, 3.5mm headphone jack aser microSD card reader ka angutsü. Surface Pro 7+ indang LTE version nungbo SIM card slot dena lir.

Maneni, Microsoft Surface Hub 2S 85-inch nung 4K (3,840x2,160 pixels) PixelSense Display den 16:9 aspect ratio aser In-cell Touch den 20 simultaneous touchpoints angutsü. Hub ya 8th-Generation quad-core Intel Core i5 CPU, Intel UHD Graphics 620, 8GB RAM aser 128GB SSD ajanga achayangtsür. Connectivity atema, Hub nung USB Type-A, mini-DisplayPort, HDMI, USB Type-C with DisplayPort, RJ45 Gigabit Ethernet, three more USB Type-C ports, Wi-Fi 5 aser Bluetooth 5.0 inoka yanglutsüogo. Tanga feature tsütsü reprangdangra, device nung 3-way stereo speakers, USB-C connectivity aser 90-degree horizontal field of view (HFOV) angutsü.

"Bhool Bhulaiyaa 2" November 19 nü sayatsü

Mumbai, Tsüklai/February 22, 2021 (Agencies): Film yanglur takotet Anees Bazmee indang psychological-comedy-thriller "Bhool Bhulaiyaa 2" film ya taküm November 19 nü theatre ajanga sayatsü terenemba lir.

Iba film nung actor Kartik Aaryan, Tabu aser Kiara Advani nungeri tongti shilem agir. Film tasenba ya 2007 küm sayaba horror comedy "Bhool Bhulaiyaa" den tatongtep alitsü. Mezüng film ya Priyadarshan-i direct asü, kong Akshay Kumar, Vidya Balan aser Shiney Ahuja nungeri tongti shilem agiba ajaki nguogo.

T-Series sabang kübok Bhushan Kumar o Krishan Kumar aser Cine 1 Studios

indang Murad Khetani nungeri "Bhool Bhulaiyaa 2" produce asütsü.

"Anees Bazmee-i direct asüba Bhool Bhulaiyaa 2"; aser Bhushan Kumar indang T-Series & Murad Khetani indang Cine1 Studios nati produce asüba film ya November 19, 2021 nü sayatsü terenemba lir," ta film yangluri ashi.

Iba film ya Farhad Samji aser Aakash Kaushik nati zülutsüogo. Taoba küm Covid-19 wara tenokdangba ajanga March ita iba horror comedy film production maparen nung tetsükdaktsü adoka liasü.

India tesem ajunga nung lockdown alitsü osang magütsüdang, production team-i Lucknow nung Bhool

Bhulaiyaa 2 film tangoka liasü. Actor asem dak alaka, "Bhool Bhulaiyaa 2" nung Rajpal Yadav aser Govind Namdev nati tongti shilem agiba angutsü.

"Shershaah" sayatsü sangdongba sülen, taküm Bhool Bhulaiyaa 2 ya Advani indang film tanabuba alitsü. "Shershaah" nung Advani den külemi Sidharth Malhotra-i shilem agiogo. "Shershaah" film ya taküm July 2 nü theatre ajanga sayatsü terenemba lir.

Aaryan, shibai Imtiaz Ali indang "Love Aaj Kal" nung tesüsa shilem agiba nguogo, pai Karan Johar indang "Dostana 2" aser film yanglur Ram Madhvani indang thriller "Dhamaka" nung shilem agiba angutsü.

Myanmar nung sorkar atsüngdokba anema... (Tapak 8 nungi...)

Yangon yimti nunga security forces jenti yoka liasü, kong longkak aiter meyirijang aika adenshi.

Mandalay nung nisung asüba ajanga Deobarnü longkak aiter temolung ajema makum, kechiaser yangji aser Yangon nung nisung meyirijang aika adenshia liasü.

Anüolen linük aikati sorkar atsüngdokba aser longkak

aiter anema tashiyim amshiba aitsür.

Burma nung mitkartemi sorkar atsüngdokba anema nokdakertem pua merenshiba asoshi United States-i mera takang agitsü, ta U.S. Secretary of State, Antony Blinken-i Twitter nung ashi.

"Onok Burma nübürtem den lir," ta pai ashi.

Britain, Germany, Japan

aser Singapore linüktemi azüdokshi aitsü aser U.N. Secretary-General Antonio Guterres-i tashiyim amshiba magizüker, ta shiogo.

November 8 election nung ashikülak mapa inyak ta tai tonglokja mitkartemi sorkar atsüngdok. Iba election nung Suu Kyi'er National League for Democracy (NLD) teloki takok tulu angu.

TENANGZÜKBA

Ni P. Chuba Ozükum-i (Yimjenkimong) Nagaland Delimitation dak sentakba keno nung June 20, 2020 anogo Social media nung "Nagas have every right to pin point those dominating tribes who have taken extra assembly seats through manipulation. For me, I take the blame as bona-fide member of Ao Community for their wrong doings in the past" iba onük prokba ajanga, iba keno dak sentakba nung Ao Senden Presidential Council-i Feb. 22, 2021 anogo jaoka tatsü talang ajak rajema angatetteper, koba onük ni zülüogo, ibaji ni aibelena zülüogo. Anungji ni Ao Senden Presidential Council tsüngdang iba aibelen asoshi tatok nangzüker aser iba keno ni meyipa agir.

Kulisür:

22/02/21

(P CHUBA OZÜKUM)

Kohima

Anogo :

CHUBA OZÜKUM

YIMJENKIMONG willg

Bhediya atema Varun aser Kriti na longjemtsü

Mumbai, Tsüklai/February 22, 2021 (Agencies): Taruba Horror-comedy Bhediya atema Varun Dhawan aser Kriti Sanon na longjemtsü terenemba lir. Project maparen takok ngua inyaktetra iba film ya April 14, 2022 nü sayatsü.

Iba film ya nüngtugu film Stree aser Bala director Amar Kaushik lenisüba kübok yanglutsü. Project tasen atema Abhishek Banerjee aser Deepak Dobriyal naprongla anisemogo.

Taruba movie indang teaser video ka Instagram sabang

ajanga lemsatepa liasü. Iba teaser ajanga, itaya aonung tesem tamang ka nung tebur ka man werewolf akümba sayur.

Bhediya ya horror film universe shilem ka ama tangoktsü, koba Dinesh Vijan indang Maddock Films ajanga nungittsü. Stree aser aruya aliba Roohi film anaprongla ya iba universe indang shilem lir.

Osang ajanga ajanga angazükba agi, Bhediya maparen tembangba sülen, iba production house yagi Mujha yanglutsü, koba Stree indang prequel ka alitsü.

Varun kibong kümer sülen, Bhediya ya pa indang mezüng project alitsü. Film tangokba maparen taküm May tashi alitsü. Osang ajanga angazükba agi, iba project nung VFX aser prosthetics maparen onsara adoktsü asünung, mapang agia iba film renemtsü.

SRK indang 'Pathan' 2022 nung sayatsü

New Delhi, Tsüklai/February 22, 2021 (Agencies): Bollywood superstar Shah Rukh Khan indang kanga dang yongya ataba movie - 'Pathan' ya 2022 nungang sayatsü. Mezüngbo iba film ya 2021 nung sayatsü asadanga liasü.

Deobarnü, Film critic aser movie trade analyst Taran Adarsh-i Instagram sabang ajanga, "#Pathan, koba mapang talangka sülen, #SRK indang mezüng project tongtumbang ka lir, iba film ya November 2021 nung sayatsü.... Küm ka sülen, iba project atema #SRK-i tongtumbang production house #YRF den longjemer," ta lemsatep.

Centre Sorkar ajanga cinema hall tem lapoktsü aser terepranger shilem 100 melatsü asoshi lemtetba sülen, tawa Yash Raj Films (YRF)-i parnok 2021 atema renemba film tem taküm sayatsü ta sangdong. Ajisüaka, iba production company yagi Shah Rukh Khan-i tongti shilem agiba 'Pathan' sayatsü asoshi osang magütsü, koba tang teyangludak aliba film tem rongnung ajaki yongya ataba film ka alitsü.

Küm asem project ka nung danga shilem magii arur sülen, iba project ya Khan indang mezüng film asütsü imlar.

Iba project nung King Khan-i tanaben acting tsütsü shilem agiba den, 'Pathan' nung Salman Khan-ia shilem tilaka agitsü imlar. Nüngtugu reality show Bigg bOss 14 Weekend Ka Vaar indang episode ka nung Khan-i iba show temer sülen pai Pathan aser tanga film nung inyaktsü metetdaktsüogo.

2018 küm Aanand L. Rai indang film Zero nung Shah Rukh Khan-i Anushka Sharma aser Katrina Kaif na den külemi shilem agiba ajaki nguogo.

Iba film - Zero nung SRK-i rajang/tar tatsü ka ama shilem agi. Pai shilem agiba jungaa agizük, saka box-office nung film ajanga takok mangu.

Pathan film ya 'War' director Siddharth Anand tetuyuba nung yangludar. Iba project ya action-thriller ka ama asadangteter aser production tsütsü Yash Raj Films ajanga nungittsü. SRK dak alaka, film nung Deepika Padukone aser John Abraham nati tongti shilem agitsü renema lir.

Karnataka nung Khelo India University Games 2021 asayatsü



Tsüklai/February 22, 2020 (Agencies): Karnataka nung taküm küm tatemlen Khelo India University Games (KIUG) ayongzüka asayatsü, ta state chief minister BS Yediyurappa aser Union Sports Minister Kiren Rijiju nati Deobarnü sangdongogo.

Iba asayamung ya Association of Indian Universities (AIU) den longjemer Bengaluru nung Jain University aser state kübok asayaba maopu balala nung asayatsü.

KIUG ya linük nung University Games tulutiba lir, koba India tenüng nungi Olympics densema international asayamung balala shilem agitsü asoshi sempet

aketba asayatem jangjatsü nükjidong nung ayonga asayar. KIUG mezüngbuba Bhubaneswar nung 2020 küm February ita asaya aser iba asayamung nung state ajak nungi universities aser college balala nungi arishi küm 25 tekübok aliba asayar 3182-i shilem agia liasü.

Linük nung küm noklang aika asayaa aruba asayatem wazüka ayutsü nükjidong nung taküm iba asayamung nung Yogasana aser Mallakhamb asayaa bendenlokogo.

Iba asaya ana benokba sülen taküm iba asayamung nung asayar 4000 shi-i shilem agitsü imlar.

Osang sangdongba mapang Yediyurappa-i, "KIUG 2021

ayongzüka asayatsü ya onok asoshi maongka tajung lir, aser iba asayamung ajanga tarutsü nung India atema takok tajung bener arutsür karbosa anitetsü temulung lema bilemer. Iba asayamung takok asoshi Karnataka sorkari takok tashi inyaktsü," ta ashi.

Asayamung nung shilem agir aika asütsü imlaa Rijiju-i, "taoba küm Odisha nung University Games kanga takok ngua asayaogo. Saisapong balala nung takok tajung anguba linüktem nung University jenjang nungi asayatem aika shimmer. US nung University Games ya Olympic nung takok angurtem bushiteta asayamung lir," ta ashi.

India tetsür boxer temi gold medal pongu angu

New Delhi, Tsüklai/February 22 (Agencies): Budva, Montenegro nung 30buba Adriatic Pearl Tournament nung India tetsür boxer tem rongnungi Babyrojisana Chanu (51kg) aser Arundhati Choudhary (69kg) natia gold medal kaka ngua, India team-i ajak senteper gold medal pongu angu aser temaba jenjang nung tembangogo.

Lucky Rana (64kg)-ia silver medal ka angu aser India tsürtemi ajak senteper medal 10 (gold pongu, silver asem, bronze ana) ngua temaba jenjang nung

tembang. Tanabuba aser tasembuba jenjang nung Uzbekistan (gold 2) aser Czech Republic (gold 1) na liasü.

Khelo India asayamung nung asemben tashi gold medal ngur alila Arundhati-i Deobarnü final asaya nung Ukraine tsür Maryana Stoiko 5-0 agi akok.

Kasa mapang nung Chanu shiba MC Mary Kom indang Imphal nung amendaker aliba academy nung training agir, laia Uzbekistan tsür Asian junior champion Sabina Bobokulova 3-2 agi koka liasü.

Ajisüaka Lucky-i 5-0 agi Finnish boxer Lia Pukkila mekoki silver medal dang angu.

Gold medal angurtem rongnung Alfiya Pathan (+81kg), Vinka (60kg) aser T Sanamacha Chanu (75kg) nung densema lir.

Asayamung tepeyong kanga junga asayaba atema Vinka nem 'Best Woman Boxer of the Tournament' award agütsü.

Tebur asaya nung gold medal ana anguba den ajak senteper medal 12 kokteta India team tanabuba jenjang nung tembangogo.

Chapions' Trophy final Flying Rabbits aser PBCC na asayatsü

Dimapur, Tsüklai/February 22 (TYO): Nagamese Baptist Fellowship (NBF) Sports Ministry Chumukedima Village-i ayongzüka 1buba Champions Trophy T-20 Cricket Tournament final nung Flying Rabbits aser Police Baptist Church Chumkedima na asayatsü.

Final Bodhbarnü asayatsü aser asayamung shibangba sentong nung Salvation Nagamese Church, Kuda village, Dimapur Pastor Moses Basena alakteta jaoker asütsü.

Asayamung shibangba sentong 10:00 ako nungi tenzütsü.

Tanü mezüngbuba semifinal asaya nung Flying Rabbits CC-i run 39 agi BSCT akok. BSCT-i mezüng field asütsü shim saka parnoki Flying Rabbits CC pur menokdangteti over 20 nung asayar 6 out ser run 203 yangludaktsü. Run arishiba mapang BSCT-i over 20 nung asayar 5 our ser run 163 dang yangluteta asaya makok. Asaya nung Lokhender-i run 74 yangluba atema pa nem man of the match award agütsü.

Tanabuba semifinal nung Police Baptist Church Chumukedima-i Diphupar CC wicket 6 agi akok. Mezüng bat amenba sülen Diphupar CC-i asayar ajak out ser run 130 yanglu. Police Baptist Church Chumkedima-i iba run ya over 13 buba nung asayar 4 out ser menepa asaya akok. Iba asaya nung asayar ana nem man of the match award agütsü. Vino-i wicket 5 agiba atem aser Subash-i run 45 yangluba den wicket 3 agiba atema tena nem iba naroküm lemdanger agütsü.

Ronaldinho tetsü Miguelina süogo

Tsüklai/February 22, 2021 (Agencies): Taoba mapang Brazil aser Barcelona nungi nüngtugu asayar Ronaldinho tetsü, Miguelina Elói Assis dos Santos arishi küm 71buba nung süogo. La Covid-19 tashidak menaba ajanga temang nung timtem adok asü. La taoba küm December ita tashidak mena aser tashidak mekokteti February 21, Deobarnü asüba osang ajanga jangjatsüogo. Miguelina ya Porto Alegre yimti nung taoba küm December ita nungi Me de Dues Hospital nung temang anepalua liasü.

Taoba küm Christmas matong tsünga FIFA World Player of the Year anaben tashi koker aliba asayar yagi tetsü mozükidangi aniraoba osang agütsü. "Medemertem kütsü dak covid-19 tashidak potetogo aser la taneptsü angutsü atema onok raradar. La intensive care nung yur treatment tajungtiba agidar. Nenok teyari ajak atema ni jelia nenok dang pelaba lemsateper. Oja tashi ita liang," ta pai metetdaktsü.

Tetsü asüba osang angazüka taoba mapang Barcelona teammate Lionel

Messi-i anir asükhü lemsatepa liasü. Messi-i Instagram ajanga Ronaldinho nem osang ka agütsü.

Messi-i, "Ronnie ni tebang agi rasaa ashitsü makoker aser mamangteter. Na aser ner kibong dangi temeim yoker. Osang angazüka ni kanga sasar. Tesunep nung anisüngzüka," ta zülutsü.

Kasa mapang nung Braxil nunger PSG nung asayar Neymar-ia Ronaldinho den asükhulemsatepa liasü. Pai, "Roni tashi ita liang. Kanga sasaa bilemer," ta zülutsü.

Maneni Ronaldinho taoba mapang asayaa aliba club Atletico Mineiro aser Paris Saint-Germain-ia, asükhü lemsatepogo.

2005 küm Ballon d'Or akoksang yagi 2002 küm World Cup ka, Barcelona nungi 2006 küm Champions League ta kokogo. Pa Gremio, Paris Saint-Germain, AC Milan, Flamengo, Atletico Mineiro, Queretaro aser Fluminense nungia asayaogo. Brazil tenüng nungi 97 ben asayaba mapang pai goal 33 idaktsü aser 2002 küm World Cup kokogo.

Naomi Osaka tanabuba jenjangi tuogo

Paris, Tsüklai/February 22 (Agencies): Australian Open koka Grand Slam title pezübuba akokba sülen Naomi Osaka Hombarnü sayaba WTA rankings nung tanabuba jenjangi tuogo.

Japan tsür la yagi final asaya nung US tsür Jennifer Brady straight sets nung koka Melbourne nung küm asem tsünga tang tanabenbuba iba asayamung koktetogo.

Arishi küm 23 tain Osaka-i tanabuba jenjang nung Romania tsür Simona Halep atsüngtokogo, shiba quarter-finals nung Serena Williams

makokba sülen tasembuba jenjangi asepzüka luogo.

Asayamung nung tamakok nguaka Williams-a jenjang pezü tejakdangi tua jenjang pezübuba tongtetogo. America tsür la ya semifinal nung Osaka-i tsükdaktsü.

Kasa mapang nung arishi küm 25 tain Brady, shibai taoba küm US Open semifinal tonga asayaogo, la tang mezüngbuba jenjang 13buba tongtetogo.

Karolina Muchova-i last eight asaya nung tsükdakjaka Ashleigh Barty maneni temaba jenjang nung lir.

February 22 nü tashi nung WTA rankings yamai alitsü:

1. Ashleigh Barty	(AUS)	9186 pts
2. Naomi Osaka	(JPN)	7835 (+1)
3. Simona Halep	(ROM)	7255 (-1)
4. Sofia Kenin	(USA)	5760
5. Elina Svitolina	(UKR)	5370
6. Karolina Pliskova	(CZE)	5205
7. Serena Williams	(USA)	4915 (+4)
8. Aryna Sabalenka	(BLR)	4810 (-1)
9. Bianca Andreescu	(CAN)	4735
10. Petra Kvitová	(CZE)	4571 (-2)
11. Kiki Bertens	(NED)	4505 (-1)
12. Belinda Bencic	(SUI)	4010
13. Jennifer Brady	(USA)	3765 (+11)
14. Victoria Azarenka	(BLR)	3535 (-1)
15. Garbine Muguruza	(ESP)	3320 (-1)
16. Johanna Konta	(GBR)	3206 (-1)
17. Elise Mertens	(BEL)	3060 (-1)
18. Iga Swiatek	(POL)	3014 (-1)
19. Madison Keys	(USA)	2962 (-1)
20. Marketa Vondroušová	(CZE)	2952

BILEMDANGANG

"Inyaktsü atema telemtetba agitsüji
ajak dang tasaktiba."